

四庫全書

子部

欽定四庫全書

子部
說郛卷六十五上

詳校官庶吉士臣陳若霖

員外郎臣牛稔文覆勘

總校官編修臣倉聖脉

校對官檢討臣蕭九成

謄錄監生臣朱文佐

欽定四庫全書

說郛卷六十五上

元 陶宗儀 撰

來南錄

李翱

元和三年十月翱既受嶺南尚書公之命四年正月己丑自旌善第以妻子止船於漕乙未去東都韓退之石澹川假舟送予明日及故洛東第訪東野遂以東野行澹川以妻疾自漕口先歸黃昏到景雲山居詰朝登上方南望嵩山題姓名記別既食韓孟別予西歸戊戌予

病寒飲葱酒以解表暮宿于鞏庚子出洛下河止汴梁
口遂泛汴流通河于淮辛丑及河陰乙巳次汴州疾又
加召醫察脉使人入盧又二月丁未朔宿陳留戊申醫
人自盧又來宿雍丘乙酉次宋州疾漸瘳壬子至永城
甲寅至涌口丙辰次泗州見刺史假舟轉淮上河如揚
州庚申下汴渠入淮風帆及盱眙風逆天黑色波水激
順潮入新浦壬戌至楚州丁卯至揚州戊辰上栖靈浮
圖辛未濟大江至潤州庚辰至常州壬午至蘇州癸未

如虎丘之山息足千人石窺劍池宿望梅樓觀走砌石
將游報息水涸舟不通無馬道不果遊乙酉濟松江丁
亥官舫隙水溺舟敗戊子至杭州己丑如武林之山

即靈

隱天竺寺

臨曲波觀輪轉登石橋宿高亭晨望平湖孤山江

濤窮竹道上新堂周眺羣峰聽松風名靈山永吟叫猿
山童學反舌聲癸巳駕濤江逆波至富春丙申七里灘
至睦州庚子上楊盈川亭辛丑至衢州以妻疾止行居
開元佛寺臨江亭後三月丁未朔朔在衢州甲子女某

生四月丙子朔翱在衢州與侯高宿石橋丙戌去衢州
戊子自常山上嶺至玉山庚寅至信州甲午望君陽山
怪峰直聳似華山丙申上干越亭己亥直渡擔石湖辛
丑至洪州過嶺南使游徐孺亭看荷葉五月壬子至吉
州壬戌至虔州己丑與韓泰安平渡江遊靈應山居辛
未上大庾嶺明日至湏昌癸酉上靈屯嶺見韶石甲戌
宿靈鷲山居六月乙亥朔至韶州丙子至始興公室戊
寅入東蔭山看大竹筍如嬰兒過湏陽峽己卯宿清遠

峽山癸未至廣州自東京至廣州水道出衢信七千六
百里出上元西江七千一百有三十里自洛川下黃河
汴梁過淮至淮陰一千八百有三十里順流自淮陰至
邵伯三百有五十里逆流自邵伯至江九十里自潤州
至杭州八百里渠有高下水皆不流自杭州至常山六
百九十有五里逆流多驚灘以竹索引船乃可上自常
山至玉山八十里陸道謂之玉山嶺自玉山至湖七百
有一十里順流謂之高溪自湖至洪州一百有一十八

里逆流自洪州至大庾嶺一千有八百里逆流謂之漳
江自大庾嶺至滇昌一百有一十里陸道謂之大庾嶺
自滇昌至廣州九百有四十里順流謂之滇江出韶州
謂之韶江

入蜀記 陸游

六日過荆門十二碛皆高崕絕壁巖突兀則峽中之
嶮可知矣過碛望五龍及雞籠山嵯峨正如夏雲之奇
峯荆門者當以險固得名碛上有石穴正方高可通人
俗謂之荆門則妄也晚至峽州泊至喜亭峽門在唐爲
硤州後改爲峽而印文則爲陝州元豐中郎官何洵直
建言峽與陝相亂請改鑄印文從山事下少府監而監
丞歐陽發言湖北之陝州從阜從夾

夾從
兩入

陝西之陝州

從阜從夾

夾從兩人

偏旁不同本不相亂恐四方謂少府監

官皆不識字當時朝士之議皆是發而卒從洵直言改

鑄云至喜亭記歐陽公撰黃魯直書七日見知州葉安

行以小舟遊西山甘泉寺竹橋石磴甚有幽趣有靜練

洗心二亭下臨江山頗疎豁法堂之右小徑數十步至

孝婦泉謂姜詩妻龐氏也泉上有龐氏祠然歐陽公不

以為信故其詩曰叢祠已廢姜祠在事迹難尋楚語訛

又此篇首章云江上孤峰蔽綠蘿初謂孤峰蒙藤蘿耳

及至此乃知山下爲綠蘿谿也又至漢景帝廟及東山寺景帝不知何以有廟於此歐陽公爲令時有祈雨文在廟中東山寺亦見歐陽公詩距望京門五里寺外一亭臨小池有山如屏環之頗佳晚羣集於楚塞樓遍歷爾雅臺錦障亭亭前海棠二本亦百年物爾雅臺者圖經以爲郭景純註爾雅於此八日過下牢關夾江千峰萬嶂有競起者有獨拔者有崩欲壓者有危欲墜者有橫裂者有直坼者有凸者有窪者有罅者奇怪不可盡

狀初冬草木皆青蒼不彫西望重山如闕江出其間則
所謂下牢谿歐陽公有詩云入峽水漸曲轉灘山更多
即此也登三游洞躡石磴二里其嶮處不可著脚洞大
如三間屋有一穴通人過然陰黑峻嶮繚山腹偃僂自
岩下至洞前差可行然下臨溪潭石壁十餘丈水聲恐
人又一穴後有壁可居鍾乳歲久垂地若柱正當穴門
上有刻云黃大臨弟庭堅同辛紘子大方紹聖二年三
月辛亥來游旁石壁上刻云景祐四年七月十日夷陵

歐陽永叔下缺一字又云判官丁下又缺數字丁者寶
臣也字元珍今丁字下二字亦髣髴可見殊不類元珍
字又永叔但曰夷陵不稱今洞外溪上又有一崩石偃
仆刻云黃庭堅弟叔向子相姪做同道人唐履來游觀
辛亥舊題如夢中事也建中靖國元年三月庚寅按魯
直初謫黔南以紹聖二年過此歲在乙亥今云辛亥者
誤也泊石牌峽石穴中有石宛如老翁持魚竿狀九日
過扇子峽重山相掩正如屏風扇疑以此得名登蝦蟆

砮水品所載第四泉是也蝦蟆在山麓臨江頭鼻吻頷絕類而背脊炮處尤逼真造物之巧有如此者自背上深入得一洞穴石色綠澗泉泠泠有聲自洞出垂蝦蟆口鼻間成水簾入江是日極寒岩嶺有積雪而洞中溫然如春砮洞相對稍西有一峯孤起侵雲名天柱峰自此山勢稍平然江岸皆大石堆積彌望正如濬渠土狀晚次黃牛廟山復高峻村人來賣茶茶如柴枝草葉苦不可口廟靈感神封嘉應保安侯皆紹興以來制書也

其下即無義灘亂石塞中流望之可畏然舟過乃不甚
覺蓋操舟之妙也傳云神佐夏禹治水有功故食於此
門左右立小石馬廟後叢木似冬青而非葉有黑文類
符篆然葉各不同歐詩刻石廟中又有張文忠一贊其
詞曰壯哉黃牛有大神力輦聚巨石百千萬億劔戟齒
牙礪硤江側壅激波濤險不可測威脅舟人駭怖失色
刳羊醜酒千載廟食張意似謂神聚石壅流以脅人求
祭饗蓋過論也夜舟人來告請無擊更鼓云廟後山中

多虎聞鼓則出十日早過鹿角虎頭史君諸灘水縮已
三之二然湍險猶可畏泊城下歸州秭歸縣界也與兒
曹步沙上回望正見黃牛峽廟後山如屏風巒嵯峨插
天第四巒上有若牛狀其色赤黃前有一人如著帽立
者昨日及今早雲冒山頂至是始見之因至白沙市慈
濟院見主僧志堅問地名城下之由云院後有楚故城
今尚在因相與訪之城在一岡阜上甚小南北有門前
臨江水對黃牛峽城西北一山蜿蜒回抱山上有伍子

胥廟大抵自荆以西子胥廟至多城下多巧石如靈壁
湖口之類十一日過達洞灘灘惡乃陸行過灘灘際多
奇石五色粲然可愛亦或有文成物象及符書者猶見
黃牛峽廟後山太白詩云三朝上黃牛三暮行太遲三
朝又三暮不覺鬢成絲歐陽公云朝朝暮暮見黃牛徒
使行人過此愁山高更遠望猶見不是黃牛滯客舟蓋
諺謂朝見黃牛暮見黃牛一朝一幕黃牛如故故二公
皆及之歐陽公自荆渚赴夷陵而有下牢三游及蝦蟆

碕黃牛廟詩者蓋在官時來游也晚泊馬肝峽口兩山對立修聳摩天略如廬山江岸多石頗礙牽百丈十一日過東濡灘入馬肝峽石壁高絕處有石下垂如肝故以名峽其旁有獅子岩岩中有一小石蹲踞張頤碧草被之如青獅子泉泠泠自岩中出溪上又有一峯孤起秀麗略如小孤舟晚抵新灘十三日舟上新灘南岸曰官漕平聲北曰龍門龍門水湍急多暗石官漕差可行故舟率由南上然石多銳易穿船故爲峽中最峻處必空

舟乃利往舟人利重載鮮不及也游江瀆北廟廟正臨
龍門下溫泉出石隙常不涸一村賴之婦人負木盜汲
盜長二尺三足以杓挹水即倒坐旁石東盜於背而去
大抵峽中多役婦負物不獨水也有婦負酒沽如負水
狀呼買之長跪以獻未嫁者率戴高二尺同心髻插銀
釵多至六隻後插牙梳如手大十四日留驛中晚渡江南
登山至江瀆南廟有碑前進士曾華旦撰言因山崩石
壅爲舟害於是著令自十月至二月禁行舟知歸州趙

誠聞于朝禁行舟疏鑿之而灘害始去皇祐三年也蓋
江絕於天聖中至是而復通然灘害至今未悉去若乘
冬春間水落石出時可併力盡鑿去銳石則灘害可除
然灘上居民皆利於敗舟賤賣板木及滯留貨賣或賂
石工以爲石不可去須斷以必行乃可成又舟之所以
敗皆失於重載當以大字刻石置驛前則過者必自懲
創矣十五日過白狗峽泊舟輿山口肩輿遊玉虛洞去
江岸五里許隔一溪所謂香溪也源出昭君村水味載

水品色碧如黛已度過溪又里餘洞門小纔袤丈既入則可容數百人宏敞壯麗如入大宮殿中有石成幢蓋幡旗芝草竹筍仙人龍虎鳥獸之屬千狀萬態莫不逼真其絕異者東石正圓如日西日半規如月予平生所見巖竇無及者有熙寧中謝師厚岑巖起題名又有陳堯咨所作記叙此洞本末云獵者得之山中云十六日到歸州館於報恩光孝寺距城一里許歸之為州纔三四百家負卧牛山臨江前即人鮓甕城中無尺寸土灘

聲常如暴風雨至隔江有楚王城亦山谷間然地比歸
州差平或云楚始封於此山海經夏啟封孟除於丹陽
城郭璞注云在秭歸縣南疑即此也然史記成王封熊
繹於丹陽裴駘乃云在枝江縣未詳孰是十七日羣集
於望洋堂玩芳亭亦皆沙石犖确之地十九日訪宋玉
宅在秭歸縣之東今為酒家舊有石刻宋玉宅三字近
以郡人避太守家諱去之可惜也二十日早離歸州出
巫峽門過天慶觀少留觀唐天寶元年碑載明皇夢老

子事巴東太守劉瑀所立字畫頗清逸碑側題當時郡
官吏胥姓名字亦佳又有周顯德中荆南判官孫光憲
為知歸州高從讓所立碑從讓蓋南平王家子弟光憲
亦知名國史有事迹蓋五代時歸峽皆隸荆渚也殿前
有栢數百年物觀下即叱灘亂石無數飯于靈泉寺遂
登舟過業灘亦名灘也水落舟輕俄頃遂過二十一日
舟中望石門關僅通一人行天下至險也晚泊巴東縣
江山雄麗大勝梯歸但井邑極蕭條邑中纔百餘戶自

令解而下皆茅茨謁寇萊公祠堂登秋風亭臨江山遂
登雙栢堂下舊有萊公所植栢今已槁死然南山重複
秀麗可愛白雲亭則天下幽奇絕境羣山環擁層出間
見古木森然往往二百年物欄外雙瀑瀉石澗中跳
珠濺玉冷入肌骨其下是爲慈溪奔流與江會予自吳
入楚行五千餘里過十五州亭榭之勝無如白雲者而
正在縣解廳事之後二十二日發巴東山益奇怪有夫
子洞者一竇在峭壁絕高處人迹所不可至然髮髯若

有欄楯不知所謂夫子者何也過三分泉自山竇中出
止兩派俗云三派有年兩派中熱一派或絕流饑饉洎
疲石二十三日過巫山凝真觀謁妙用真人祠真人即
世所謂巫山神女也祠正對巫山峯巒上入霄漢山脚
直挿江中議者謂太華衡廬皆無此奇然十二峯者不
可悉見所見八九峯惟神女峰最爲纖麗奇峭宜爲仙
真所託祝史云每八月十五夜月明時有絲竹之音往
來峰頂上峰頂上猿皆鳴達旦方漸止廟後山半有石

壇平曠傳云夏禹見神女授符書於此壇上觀十二峯
宛如屏障是日天宇晴霽四顧無纖翳惟神女峰上有
白雲數片如鸞鶴翔舞徘徊久之不散亦可異也祠舊
有鳥數百送迎客舟自唐幽州刺史李貽詩已云羣鳥
幸胙餘矣近乾道元年忽不至今絕無一鳥不知其故
泊清水洞洞極深後門自山後出黥閣水流其中鮮能
入者歲旱祈雨頗應二十四日早抵巫山縣在峽中亦
壯縣也市井勝歸峽二郡隔江南陵山極高大有路如

綫盤屈至絕頂謂之一百八盤蓋施州正路黃魯直詩
云一百八盤攜手上至今歸夢繞羊腸即謂此也縣解
有故鐵盆底銳似半甕狀極堅厚銘在其中蓋漢永平
中物也缺處鐵色光黑如佳漆字畫淳質可愛玩有石
刻魯直作盆記大略言建中靖國元年予弟叔向自涪
陵尉攝縣事予起戎州來寓縣解此盆舊以種蓮余洗
滌乃見字云遊楚故離宮俗謂之細腰宮有一池皆當
時宮中燕遊之地今堙没略盡矣三面皆荒山南望江

山奇麗又有將軍墓東晉人也一碑在墓後跌陷入地
碑傾前欲壓字纔半存二十六日入瞿唐峽兩壁對聳
上入霄漢其平如削成仰視天如仄練然水已落峽中
平如油盞過聖姥泉蓋石上一罇人大呼於旁則泉出
屢呼則屢出可怪也晚至瞿唐關唐故夔州與白帝城
相連杜詩云白帝夔州各異城蓋言難辨也關西門正
對灩澦堆堆碎石積成出水數十丈土人云方夏秋水
漲時水又高於堆數十丈入謁白帝廟氣象甚古松柏

皆數百年物有數碑皆孟蜀時立庭中石筍有黃魯直
建中靖國元年題字又有越公堂隋楊素所創少陵爲
賦詩者已毀近所築亦宏壯自關而東即東屯少陵故
居也二十七日早至夔州州在山麓沙上所謂魚腹永
安宮也今爲州倉而州治在宮西北甘夫人墓西南景
德中轉運使丁謂薛顏所徙比白帝頗平曠然失關險
無復形勢在瀼之西故一曰瀼西土人謂山間之流通
江者曰瀼云州東南有八陣磧孔明之遺迹碎石行列

如引繩每歲江漲磧上來數十丈比退陣石如故

攬轡錄

范成大

乾道六年閏五月戊子成大被命以資政殿大學士與崇
信軍節度使康誥為奉使大金國信使副六月甲子出國門
八月戊午度淮金遣尚書兵部郎中田彥臯行侍御史
完顏德溫為接伴使副皆帶銀牌金法出使者必帶牌
有金銀木之別上有金國書准勅急遞字及阿固達花
押宣差者所至視三品朝旨差者視五品庚申過虞姬
墓墓在路左雙石門出藜草間往來觀者成蹊甲子至

南京金改爲歸德府過雷萬春墓環以小牆額曰忠孝
雷公之墓西門外南望有宋玉臺及張巡許遠廟世稱
雙廟睢陽人又謂之雙王廟丙寅過雍丘縣二十里過
空桑世傳伊尹生于此一里過伊尹墓道左有碑堠石
刻云湯相伊尹之墓過陳留縣縣有留侯廟西門外十
里孟莊有孟姜女廟丁卯過東御園即宜春苑也顏垣
荒草而已二里至東京金改爲南京入新宋門即朝陽
門也金改曰弘仁門彌望悉荒墟入舊宋門即麗景門

也金改爲賓曜門過大相國寺傾簷缺壁無復舊觀橫
入東御廊門絕北馳道出西御廊門過交鈔所交鈔所
者金本無錢惟煬王亮嘗一鑄正隆錢絕不多餘悉用
中國舊錢又不欲留錢于河南故做中國楮幣於汴京
置局造官會謂之交鈔擬見錢行使而陰收銅錢悉運
而北過河即用見錢不用鈔鈔文曰南京交鈔所准戶
部符尚書省批降檢會昨奏南京置局印造一貫至二
貫例交鈔許人納錢給鈔河南路官私作見錢流轉若

赴庫支給即時給付每貫輸工墨錢五十文七年納換別給錢以七十爲陌僞造者處斬償錢三百千前後有戶部管當令史幹當官交鈔庫使副書押四圍畫雲鶴爲飾焉入都亭驛歇泊舊京自城破後創痕不復煬王亮徙居燕山始以爲南都獨崇飾宮闕比舊加壯麗民間荒殘自若新城內大抵皆墟至有犁爲田處舊城內市肆皆苟完而已四望時見樓閣崢嶸皆舊宮觀寺宇無不頽毀民亦久習其俗態度嗜好與之俱化最甚者

衣裝之制盡改革矣自過淮已北皆然而京師尤甚惟婦人之服不甚改而戴冠者甚少多縮髻貴人家即用珠瓏總冒之謂之方髻庚午出驛循東御廊百七十餘間有面西櫺星門大街直東出舊景靈東宮也過櫺星門側望端門舊宣德樓也金改為承天門五門如畫兩傍左右昇龍門東至西角樓轉東逾匙頭街御廊對皇城俱東出廊可二百許間過左掖門至皇城東角樓廊亦如畫出樊樓街轉土市馬行街出封丘門即安遠門

也金改爲元武門門西金水河舊交城曲江之處河中
臥石礪礪皆良岳所潰過藥市橋街蕃衍宅龍德宮擷
芳擷景二園樓觀俱存擷芳中喜春堂猶巋然所謂八
滴水閣者使屬官吏望者皆殞涕不自禁也今以爲上
林勝官過清輝橋出新封丘門舊景陽門也金改爲柔
遠館壬申過伏道有扁鵲墓墓上有幡竿人傳云四傍
土可以爲藥或於土中得小圓黑褐色亦可以治病伏
道艾醫家最貴之十里即湯陰縣也癸卯過河河上有

美里城四垣儼然居民林木滿其中過相州市有秦樓
翠樓康樂樓月白風清樓皆旗亭也秦樓有一婦衣金
縷鵝黃大油袍金縷紫勒帛褰簾吳語云是宗室女郡
守家也遺黎往往垂涕嗟憤指使人云此中華佛國人
也老姬跪拜者尤多畫錦堂尚存今嘗更修飾之過漳
河入曹操講武城周遭十數里城外有操疑塚七十二
散在數里間傳云操塚正在古寺中高翻墓在道傍碑
云魏侍中黃鉞大尉錄尚書事渤海高公翻墓翻字飛

爵事不見于史甲戌過臺城鎮故城延袤數十里城中
有靈臺坡陀邯鄲人春時傾城出祭趙王歌舞臺上城
傍有廉頗藺相如墓三十里至邯鄲縣牆外居民以長
竿磔白犬懸其首別一竿縛茅浸酒揭於上云金國人
用以祭天禱病甲子過河六十里至柏鄉縣縣人云沙
河直東有堯山縣古堯山也堯葬焉有放勳廟乙酉過
良鄉縣是日大風幾拔木接伴吏云此謂之信風使人
遠來此風先報使入城也丙戌止燕山城外燕賓館燕

畢與館伴使副並馬行柳堤緣城過新石橋中以杈子
隔絕道左邊過橋入豐宜門即外城門也過石玉橋石
色如玉橋上分三道皆以闌楯隔之雕刻極工中爲御
路亦闌以杈子兩傍有小亭中有碑曰龍津橋入宣陽
門金書額兩頭有小四角亭即登門路也樓下分三門
中門爲御路常闔皆畫龍兩傍門通行皆畫鳳入門北
望其闕由西御廊首轉西至會同館戊子早入見上馬
出館復循西御廊至橫道至東御廊首轉北循簷行幾

二百間廊分三節每節一門路東出第一門通街第二門通毬場第三門通太廟廟中有樓將至宮城廊即東轉又百許間其西亦有三門但不知所通何處望之皆民居東西廊中馳道甚濶兩傍有溝溝上植柳兩廊屋脊皆覆以青琉璃瓦宮闕門戶即純用之馳道之北即端門十一間曰應天之門舊嘗名通天亦開兩挾有樓如左右昇龍之制東西兩角樓每樓次第攢三簷與挾樓皆極工巧端門之內有左右翔龍門日華月華門前

未早行三里過堯城渡方輿記云堯南巡至此又縣北
二十里櫟山下有舜城古老云舜南巡至此又縣北六
里斷崖石壁之上有印文圓如馬蹄兩兩相對圖經云
許旌陽逐蛟至此所留也邑官送別二十里地飯三十
里之楓門嶺晚宿遶山去縣已七十五里地壬申脯時
抵石門市為鄱陽西尉治所乙亥早發石門游道旁南
臺院破敞無足觀又二十里飯車陂又三十里過童子
渡相望有小山俗號童子塚其說謂九女溺死甚不經

又二十里宿觀岡丙子早行二十里飯三口又二十里
有居民百餘家謂之四十里店又二十五里落路過薦
福禪寺避入城人事之勞也寺蓋古刹所謂轟碑者其
前即東湖方丈後大竹中有青亭甚佳丁丑晚登舟壬
午至餘干江口距邑尚十五里自此順流而下溪水瀰
浸田野皆為陂池癸未黎明至鄔子寨入湖巨浸稽天
非丙戌經從之比未後將入港湍流不可泝復行石磔
湖約二十里穿小竇達於港繫舟蘆間四無人烟彌望

皆水是日過湖畧無風濤有小蛇昂首引舟抵岸乃回
戲作小詩云萬頃湖光似鏡平蜿蜒遂得導舟行從來
仕路風波惡却是江山不世情乙酉風雨不止水益漲
入池口趨寂照院僧言院興於天祐十五年戊寅舊名
資福仁宗治平中改今名丁亥風稍定解舟行數里望
大門院在水中棹小舟往游至則破敞將傾一僧出門
隔淺水遙語而回稍前涉高機湖菰蘆之場皆為水沒
野鼠無數被浸灌依聚沫而立晚泊徐汊龔帥差小舟

來戊子捨鄱陽之舟以小艇乘順風而行晚泊龍沙章
江禪院挈家投宿己丑飯罷挈家游秋平酌淺沙泉遂
過列岫亭入報恩禪院長老曉林眉山入藏後有鐵文
殊像甚大歸入景德禪院觀銅佛鍾傳所鑄也登閣閑
望庚寅移舟滕王閣下挈家屬寓閣上如遷喬木也丙
申大兄先乘舟歸廬陵六月戊戌朔己亥舟行泊將家
灣庚子早行十里過生米鎮又二十餘里泊曲尺湖辛
丑行二十里至市汊又十里泊稗堆步相對即龍霧洲

驂鸞錄

范成大

石湖居士以乾道壬辰十二月七日發吳郡帥廣西泊舟姑蘇館十七日至湖州十九日遊北山石林乘輕舟十里餘登籃輿小憩牛氏歲寒堂自此入山松桂深茂幽絕無塵事過大嶺乃至石林則棟宇傾頽兩廊盡拆去成菜畦矣正堂無恙亦有舊牀榻在凝塵中堂正面十山高峰層巒空翠照衣袂略似上天竺白雲堂所見而加雄尊自堂西過二小亭佳石錯立道周至西巖石

益奇而多有小堂曰承詔葉公自玉堂歸守先隴經始之初初有此堂後以天官召還受命於此因以爲志焉其旁登高有羅漢巖石狀怪詭皆嵌空裝綴巧過鐫刻自西巖回步至東巖石之高壯礪碕又過西巖小亭亦類矣葉公好石力剔山骨森然發露若林而開徑於石間亦有自他所移徙置道旁以補缺空者方公著書譯經於堂上四方學士聞風仰之如璇璣景星語石林所在又如仙都道山欲至不可得蓋棺未幾而其家不能

守委而棄之灌莽叢薄間遊子相與徘徊歎息不能去
或謂此地離人太遠岑蔚荒虛非大官部曲衆多者難
久處又云公沒後山鬼搶攘暮夜與人錯行婦子不能
安室故諸郎去之云出石林飯旌善寺葉氏墳祠也雪
川有兩玲瓏山石林爲大玲瓏又有小玲瓏在長興縣
界路口聞其山尤勝小玲瓏今屬沈氏沈氏之父死二
子幼方檢校於官此山石色微黃而更奇古一丘在空
中洞穴十數皆旁相通貫故名玲瓏泉聲瀉壞壘中窈

如深谷堂前小池石如馬虺隤其中池後山屏上洗出
之石巖積嵌巖巧怪萬狀缺罅清泉澗泓叢桂覆其上
亭館既無人居亦漸荒廢雲川特無好事者能損厚資
買之沈氏雖不得山亦足以豪矣杜牧之所遊玲瓏即
石林是也小玲瓏晚出而加勝由沈家步登舟回至城
下一鼓後矣二十一日宿德清縣泊舟左顧亭孔愉放
龜處也庭前兩大枯木可千年而挺立不朽德清古之
餘不地今孔侯墓廟在焉廟居墓前與其夫人像皆盤

膝坐二十三日宿餘杭縣苕溪館二十八日宿富陽縣
三十日發富陽雪滿千山江色沉碧夜小霽風急寒甚
披使北時所作錦袍戴氈帽坐船頭縱觀不勝清絕剡
溪夜汎景物未必過此晚宿嚴州桐廬縣癸巳歲正月
一日巳午間至釣臺率家人子登臺講元正禮謁三先
生祠登絕頂掃雪平石上諸山縞然凍雲不開境過清
矣臧獲亦貪殊景皆忍寒犯滑來登始予自紹興已卯
歲以新安戶曹沿檄來始識釣臺題詩壁間後十年以

拈蒼假守被召復至自和二篇及今又四年蓋三過焉
復自和三篇薄宦區區如此豈惟愧羊裘公見篙師灘
子慚顏亦厚二日至嚴州泊定川館七日至蘭溪泊澄
江館九日至婺州泊金華驛十二日宿龍遊縣龍丘驛
十三日至衢州十八日過常山縣十九日宿信州玉山
縣玉川驛二十五日過弋陽縣二十六日過貴溪縣二
十七日過饒州安仁縣二十八日至餘干縣閏月一日
宿鄔子口鄔子者鄔陽湖尾也名爲盜區非便風張帆

及有船伴不可過四日至隆興府泊南浦亭五日登滕
王閣其故址甚侈今但於城上作大堂耳十一日過豐
城縣十二日宿臨江軍十六日宿新喻縣十七日宿分
宜縣十八日至袁州聞仰山之勝久矣去城雖遠特往
遊之二十五里先至李惠廟廟祠兄弟二王不血食其
神龍也舊傳二龍昔居仰山中以其地施仰山祖師遷
居于此廟有陽氏神稱吳時加封司徒竹冊尚存又稱
保大元年余向居鄉得吳江村寺石幢所記亦以保大

紀年蓋錢氏有浙時或嘗用楊氏正朔此二證爲甚確也出廟三十里至仰山履喬松之磴甚危嶺阪之間皆田層層而上至頂名梯田晚出山復入袁州二十六日宿萍鄉縣萍實驛人以此地爲楚王得萍實之地然去大江遠非是三十日宿潭州醴陵縣二月三日泛湘江七日宿衡山縣十二日至衡州北行岡隴將盡忽一峰特起如大磯浸江中蒸水自邵陽來繞其左瀟湘自桂林零陵來繞其右而皆會於合江亭之前併爲一水以

東去石鼓雄踞要會大畧如春秋霸主號令諸侯勤王
蒸湘如兄弟同奔來會稟命載書乃同軌以朝宗蓋其
形勝如此十五日捨舟遵陸登回鴈峰十八日宿永州
祁陽縣十九日遊浯溪浯溪近山石澗也噴薄有聲流
出江中臨石崖數壁纔高尋丈中興頌在最大一壁碑
之上餘石無幾所謂石天齋者說者謂或是天然整齊
之義二十日渡湘水即至愚溪二十六日入桂林界有
大石表跨官道榜曰廣南西路家人舉頭驚詫以爲何

爲至於此也二十八日至靈州縣又六十里至八桂堂
桂林北城之外圃也未至桂林二三里泊八桂堂旬日
三月十日入城交府事郡治前後萬峰環列與天無際
按桂林自唐以來以山川竒秀稱韓文公雖不到然在
潮熟聞之故詩有參天帶水翠羽黃柑之語末句乃曰
飛鸞不暇驟蓋歆羨之如此故余行記以驟鸞名之若
其風土之詳則有桂海虞衡志焉

吳船錄

范成大

石湖居士以淳熙丁酉歲五月二十九日戊辰離成都泊舟合江亭下合江者乃岷山江別派自永康流入成都又彭蜀諸郡水皆合於此以下新津綠野平林煙水清遠極似江南風景亭之上曰芳華樓前後植梅甚多蜀人入吳者皆自此登舟其左則萬里橋諸葛孔明送費禕使吳曰萬里之行始於此後人因以名橋杜子美詩曰門泊東吳萬里船正爲吳人設余在郡時每出東

都過此橋輒爲慨然六月己巳朔發家屬舟下着州彭
山縣泊單騎轉城過東北門又轉而西自侍郎堤西走
岷山道中五十里至邛觀者塞途嚴裝盛飾帶幕相望
蓋自來無制帥行此路者庚午至永康軍崇德廟在軍
城西門外秦太守李冰父子廟食處也辛未登城西
樓其下岷江對江即岷山最近者曰青城其尤大者曰
大面山大面之後皆西關山矣西門名玉壘關將至青
城當再渡繩橋每橋長百二十丈分爲五架橋之廣十

二繩相繼排連上布竹筴鑽立大木數十於江沙中輦石固其根每數木作一架掛橋於半空大風過之掀舉幡幡然大略如魚人曬網染家晾彩帛之狀又須捨輿疾步稍從容則震掉不可行望者皆失色郡人云稍迂數里有白石渡可以船濟然極湍險也晚至青城山曰寶仙九空洞天夜宿丈人觀觀在丈人峯下巔峙如屏觀之臺殿築於巖腹丈人峯自唐以來號五岳丈人儲福定命真君傳記略云真君姓甯名封與黃帝同時帝

從之問龍躡飛行之道本朝賜名會慶建兔宮癸酉自
丈人觀西登山五里至上清宮宮在最高峰之顛以板
閣挿石作堂殿下視丈人峰如牆堵耳岷山數百峰悉
在闌檻之下如翠浪起伏勢皆東傾一軒對大面山更
上六十里有夷坦道曰芙蓉坪道人於彼種芎非留旬
日不可登且涉入夷界雖羽衣輩亦罕到此雪山三峯
爛銀珠玉闕出大面後雪山在西域去此不知幾萬里
而了然可見則其峻極可知上清之遊真天下偉觀哉

夜有燈出此山以千百數謂之聖燈聖燈所至多有說者不能決或云古人所藏丹藥之光或草木之靈者亦有光或有謂神龍山鬼所作其深信者則以爲先聖之所設化也甲戌下五里復至丈人觀二十里早頓長生觀范長生得道處也乙亥十五里發青城縣丙子二十里早頓周家莊十里至蜀州郡圃內西湖極廣蘆花正盛呼湖船泛之繫纜修竹古木間景物甚野爲西州勝處湖中多小菱可食蜀無菱至此始見之丁丑三十里

早頓江源縣四十里宿新津縣成都及此郡送客畢會
邑中借居僦舍皆滿市人以爲盛成都萬里橋下之江
與岷正派流于此戊寅爲送客住一日飯罷發遣令各
歸留者尚十五六已卯以小舟至彭山與孛累船會即
解維午後至箬州城外江即玻瓈江也冬時水色如此
方夏潦怒濤漲皆黃流耳辛巳招送客燕於箬館與叙
別壬午發箬州六十里午後至中巖號西川林泉最佳
處相傳爲第五羅漢詰矩那道場又爲老慈姥龍所居

凡五里至慈姥巖巖前即寺也甲申早出山至嘉定日未晡自晷至嘉百二十里中巖其半塗也乙酉泊嘉州壬寅食後發嘉州僅行二十里至王波渡宿蜀中稱尊老者爲波祖及外祖皆曰波又曰有所謂天波日波月波雷波者皆尊之之稱此王波蓋王老或王翁也宋景文嘗辨之謂當作皤字魯直貶涪州別駕自號涪皤或從其俗云癸卯發王波渡四十里至羅漢鎮百里至犍爲縣過縣三十里至下壩宿甲辰發下壩百里至宣化

縣百二十里至敘州繞亭午敘古戎州也山谷當謫敘
居小寺中號大死菴後人遂作祠堂乙巳發敘州十五
里廣南江來合大江通百二十里至南溪縣四十里至
江安縣百二十里至瀘州方申時近城有渡瀘亭不知
諸葛孔明的從何處渡或云敘正對馬湖江馬湖入諸
夷路也當自此渡戊申發瀘州百二十里至合江縣已
酉發合江二百四十里至恭州江津縣二十里過漁洞
宿泥培村庚戌發泥培村六十里至恭州自此入峽路

大抵西川至東川風土已不同至峽益陋矣辛亥發恭
州嘉陵江自利閬果合等州來合大江百四十里至樂
溫縣蒲氏墨舊出此縣大韶死久矣其族猶賣墨不復
能佳亦以價日賤故也七十里至涪州排亭之前波濤
大洶淖如屋不可捐船過州入黔江泊此水自黔來合
大江江怒濤水色黃濁黔江乃清冷如玻璃其下悉是
石底自成都登舟至此始見清江涪雖不與蕃部雜居
舊亦蠻俗號爲四種人者謂華人巴人及廩君與盤瓠

之種也壬子發涪州百二十里至豐都縣數十里至竹
平宿癸丑發竹平七十里至忠州百十里至萬州宿甲
寅發萬州六十里至開江口水自開建來合大江四十
里至下巖四十里至雲安軍又十餘里風作水湧泊舟
宿乙卯行百四十里至夔州余前年入蜀以重午至夔
魚復方漲八陣在水中今來水更過六十四絕不復得
見頗有遺恨峽江水性大惡飲輒生癭婦人尤不能免
前過此時婢子輩汲江而飲數日後發熱一再宿項脛

腫起十餘人悉然至西川月餘方漸消散丙午泊夔州
早遣視瞿塘水僅能沒灩澦之頂盤渦撒出其上謂之
灩澦撒髮人云水勢如馬尚不可下况撒髮邪是夜水
忽驟漲渰及排亭及明走視灩澦則已在五丈已下或
可以僥倖入峽而夔人尤難之丁巳水復漲遂決解維
十五里至瞿塘口水平如席獨灩澦之頂猶渦丈澆滯
舟拂其上以過搖櫓者皆汗手死心面無人色蓋天下
至險之地行路極危之時旁觀者莫不神驚余在舟中

一切付之自然不暇他問據胡床坐抬頭處任其盪漾
每一舟入峽數里後舟髮方續水勢急怒恐猝相遇不
可解折也帥司遣卒執一旗次第立山下上一舟平安
則簸旗以招後舟舊圖經云灩澦大如樸瞿塘不可觸
灩澦大如馬瞿塘不可下此俗傳灩澦大如象瞿塘不
可上蓋非是也後人立石辨之甚詳峽中兩岬高巖峻
壁斧鑿之痕皴皴然而黑石灘最號險惡兩山東江驟
起水勢不能平余來水勢適平俗所謂茶槽者又水大

漲渰沒草木謂之青草齊則諸灘之上水寬少浪可以
犯之余之來此未能盡漫草木但多草根齊亦不可涉
然犯難而行不可回首也十五里至大溪口水稍濶亦
差遠夔峽之險紆矣七十里至巫山縣宿縣人云昨日
水大漲灑瀕恰在船底故可下夔峽巫峽則不然却須
水退十丈乃可是夕水驟退數丈同行者皆有喜色戊
午乘水退下巫峽灘瀧稠險淖洄湫其危又過夔峽
三十五里至神女廟廟前灘尤洶怒十二峯俱在北岸

前後映帶不能足其數十二峰皆有名不甚切事不足錄所謂陽臺高唐觀在來鶴峰上亦未必是神女之事據宋玉賦本以諷襄王後世不察一切以兒女子襲之今廟中石刻引庸城記瑤姬西王母之女稱雲華夫人助禹令鬼神斬石疏波有功見紀今封妙用真人廟額曰凝真觀廟前有馴鴉容舟將來則迓於數里外舟過亦送數里土人謂之神鴉二十里至東奔灘高浪大渦巨舩掀舞不當一槁葉或爲渦所使如磨之旋三老挽

招竿叫呼力爭以出過二十里過巴東縣九十里至歸
州未至州數里曰叱灘其險又過東奔連接新城下大
灘曰人鮓甕已未泊歸州八月戊辰朔發歸州五里至
白狗灘三十里至新灘此灘名豪三峽八十里至黃牛
峽上有沼川廟黃牛之神也亦云助禹疏川者廟皆大
峯峻壁壁有黃迹如牛上一墨迹如人牽之云此其神
也順而下流黃牛峽盡則爲扇子峽過此盡峽中灘矣
三十里得南岸則盡平地曰平善壩舟出峽至是人皆

相慶如更生舟師篙工皆有犒賜己巳發平善壩三十里至峽州登至喜亭亭弊甚不稱醉翁之記百四十里至楊木寨宿庚午發楊木寨八十里至江陵之枝江縣四十里至松滋縣二百一十里至荊州南之沙頭乙亥移舟出大江宿江瀆廟前丙子發江瀆廟七十里至公安縣百二十五里至石首縣丁丑發石首百七十里至魯家洲自此至鄂渚有兩塗一路遵大江過岳陽及臨湘嘉魚二縣經岳陽通洞庭波浪連天有風即不可行

故客舟多避之一路自魯家泖入純純者江旁支流如海之神泖其廣僅通舟不畏風浪兩岸皆多蘆荻時時有人家但支港通諸小湖故爲盜區自魯家泖避大江入純月明行三十里宿戊寅己卯皆行純中庚辰行過所謂百里荒者皆湖灤菱蘆不復有人迹巨盜之所出沒也壬午行不止辰出大江午至鄂渚泊鸚鵡洲前己丑解維小泊漢口午後風息通行百八十里至三江口宿三江口之名所在皆有凡水參會處皆稱之庚寅發

三江口辰時抵赤壁泊黃州臨臬亭下辛巳發黃州四
十里過巴州河通行二百三十里至桐木溝宿壬辰發
桐木溝八十里至馬頭宿癸巳發馬頭百二十五里至
江州泊琵琶亭前戊戌發江州回望廬山漸東過湖口
望大孤如道士冠立碧波萬頃中亦奇觀也九十里至
交石夾宿己亥發交石夾東望孤山如艾炷澎浪磯在
其南風起浪作食頃通行八十里宿庚子風未止強移
舟數里至馬當對岸小港中泊辛丑風少緩移舟五六

里至波斯夾中泊癸卯發波斯夾行幾三百里至長風
汛下口宿甲辰發長風汛百里午至池州十數里風作
泊清溪口戊申發清溪宿長沙己酉發長沙入夾行晚
泊太平州辛亥發太平州壬子至建康府泊費心亭下
丙辰發建康丁巳泊長蘆襪被宿寺中此爲達磨一葦
浮渡處戊午至瓜州己未至鎮江府壬戌買小舟發鎮
江久去江浙奔走川廣乍入舢艫蕭然有漁釣舊想不
知其身之自天來歸也甲子至常州丙寅發常州平江

親戚故舊來相迎迓者陸續于道恍如隔世焉冬十一月丁卯朔雨中放舟行戊辰未至澣墅十里泊己巳入盤門

汎舟錄

周必大

三月乙丑乘便風渡湖滄達宜興婦家來迎方知外舅
以二月十九日不祿四月戊辰朔癸酉地理僧淨如來
乙亥邑中迎社頗盛云周孝侯生日也癸未早仲寧仲
賢過善權設水陸齋約同登舟風水俱逆其行甚緩晡
時掠桐渚晚望楊氏墳菴頗壯麗由小港登馬方墳闕
角僭侈非度自此至寺纔數里乃肩輿以行過離墨山
最高或謂與善權通號離墨云稍前即董山園碑在焉

欲上而日已落徑入善權勅額曰廣教而龍圖閣待制
傅楫興化人嘗爲徽宗端邸宮僚既死援王陶例未至
執政特賜功德院而不改廣教之額楫墓在寺側其羣
從亦有依寺而居者按舊碑寺本齊武帝贖祝英臺莊
所置山東北有石壇號九斗壇世傳梁武帝禱雨於此
會昌廢寺田產歸鍾離寺咸通八年鳳翔節度使李贛
奏云臣大和中嘗肄業此寺崖洞有白龍之異願以已
俸贖田復舊詔可之其碑并贛詩尚存仍畫像以祀南

唐時嘗爲道觀後主復爲寺宣政間傅氏子狗時又請
爲崇道觀建炎間復舊單氏圖經云殿屋乃廬州刺史
張崇造寺多唐人題名今獨乾符以來塑像役人姓名
班班可考殿柱上有雷部鬼書曰駱審火者一謝鈞火
者二字皆倒書于柱視之不見所謂唐匠姓名及駱審
火字其謝鈞火入木寸餘又有詩米等字皆遒勁可愛
客館崖石奇秀瀦水爲池頗立亭宇於其上壁間有元
豐甲子秋九月彭城劉彛執中夜宿寺中追懷陳襄述

古詩云精識世所稀友道古難有伊人雖云亡遺德不
可朽嘗厭石渠遊是邦爰出守浚河納湖波股泝活猷
畝學宮啓城隅塗人或薪樵既富而教之薄俗適忠厚
矧予平生時昏弱賴磨揉共頤姬孔微肯出臯稷後醇
源浩罔涯實行靡容苟猶其老崖阿寂寞待同扣天乎
奪大成旅葬宜興阜我未薙荆榛雨淚滴杯酒慟哭起
秋風落葉紛林藪永懷三益思語報乏瓊玖願子生人
間世世篤親友古人於交遊情誼蓋如此述古墓去寺

十餘里甲申晴宜興人謂堯時夏雨甲申而致九年之水故甚畏之早同仲賢仲寧地理僧淨如過丁墅卜地去寺約二十里飯於吳寺丞菴回至懷相塢入吳秀才菴少休天氣驟熱將至善權由傅公神道繞寺後訪二洞約行里餘度小嶺乃至焉乾洞在上有大石當戶其四周髣髴數疊牆竇蓋下垂鵝管懸綴有鹽堆米堆惟肖視張公洞差小然亦可容千人水洞在乾洞之下水自山出未至洞口披石斗瀉匯而爲湫細流入洞洞中

石田皆成疆畔每丘纔盈尺高高下水滿其中石丈
感成花草如雕鐫者陳述古詩云陰陽融結此山川便
有鹽堆與石田風俗每來占水旱却疑乾洞有神仙注
謂乾洞中有鹽米堆石田數丘鄉人歲時禱祈以占水
旱若田中有水則爲豐年之兆又詩云水洞深無百尺
泉白龍騰蟄已多年誰知此物能雲雨常濟山南萬頃
田注謂圖經云水洞中有泉大旱不竭常有雲氣昇騰
太和中白龍出於洞中予觀石田在水洞而述古乃言

於乾洞不知何故白龍即李贛所見者水既入洞即伏
流達寺中昨日所遊崖石亭宇正臨其上時有四足鮎
魚出遊村夫或擊而食之今日僮僕輩亦有見之者水
由寺而出灌溉之利遠矣遊洞畢回視傅公塚乃歸寺
在宜興西南陸行四十里舟行六七十里張舜民南遷
時過黃州聞東坡云近獲一魚似鮎而有四足能履地
而行或云鯢魚也乙酉早肩輿二三里至董山按三國
志金陵實錄孫皓因國山有石自立遣司空董朝太常

周處封禪刻石埋銀龍銅馬于其下其石如囷故俗呼
囷碑山高數十丈與徐宗策杖同登碑字三面可辨惟
東向皆剝裂模糊蓋無屋以庇之也俗呼董山謂董朝
也碑詞載所遺官姓名而無周處史氏誤矣前長老法
濟參齋罷登舟歸邑初行十里四望塵沙漲天既入湖
滄西北風大作浪湧舟駛逼暮到家庚寅大風而晴早
同仲寧仲賢如師再出南門卜地一里許曰畫店二三
里曰山門蓋自此入山地南來諸山聚於陽羨界太湖

而止對縣治號銅棺山

一曰居山

尤雄拔故此邑多富貴之

家壬辰早約莊德邁飯訖泛舟數里至言村訪胡茂老
松年樞密舊居有堂榜曰萬幅平遠邑人第呼橫山堂
堂去湖濱纔百餘步湖外峯巒橫陳又其外遠山如屏
方茂老所築時陸藝花木水植荷蓮死才二十一年皆
湮廢不治而第宅頽壞予甲戌歲嘗與外舅具舟欲來
大風而止今日亦遇風雨甲午早同仲寧仲賢淨如出
南門過橫澗入袁氏菴觀地投宿洞靈觀知觀邵惟道

字集虛極有幹才支傾補弊觀遂復興登張公洞中路
回望太湖宜築小亭焉山非甚大而洞極廣蓋一山皆
空耳其間肖像不一而數柱若擎之者乙未早過湖泖
鎮跨溪有橋號侍郎橋或曰謂陸希聲而圖誌頗疑其
稱呼不相應也飯于金沙寺登頤山訪講易臺酌潛虬
泉皆希聲遺迹也寺有岳飛己酉歲留題刻石詞甚壯
遊李福墳菴即李顯忠斬之者入鎮中觀潛泉仲寧兄
弟同淨如過山中觀地予乃與道士王見志字全隱者

遊惠氏南園久之過北園仲寧兄弟至遂買舟泛湖狀
而歸兩岼多朱藤故號畚畫溪歷唐貢山淨如云唐貢
茶之社也又過冢山蠡湖甲夜抵邑中

汎舟錄

周必大

乾道丁亥閏七月丙寅朔甲午拂旦同邵方遠出南門
過王庭修道人處獻石棋子一副張公洞泥所造也進
至香山與仲賢大悅飯茨舍遂過湖泐西行三里至孫
仲益墳菴修竹流水門徑幽深自其胸次丘壑也龜潭
形如龜澗不盈丈有亭曰酌潦而菴名千息對祠堂創
一龕華甚設四几案爲其二室一婁且留自待也又西
南行行一里訪玉女潭雖有茅亭而路皆榛翳賴扶欄

表之潭在四山中三面皆石崖有竇上達水浮墨色可畏投以物則盤旋而下唐權德輿李幼卿獨孤及皆有詩自此東行里餘呼蕘兒導至佛窟崖崖高一丈五尺濶數倍水出其左或云自玉女潭來流而爲澗石佛數身皆斷軀幹或云像出崖中土人神之多求嗣焉其毀之必以不驗也又西南二三里由王直中知軍家墓道出支徑訪龍潭伐篠刺棘望石崖而進有蔣天成者得其地樊以竹木路不可行易樵湫也窺觀毛髮森疎回

望蔣菴不遠會日昃歸飯千息菴投宿洞靈知觀邵惟
道置酒秉燭過聖堂觀元豐間劉宜夫誼及元祐辛未
五月僧仲殊留題然後寢八月乙未朔早至前知觀應
若谷房賞秋香觀中有仁廟時賜度人經一藏今漸散
失歸至香山少休遂入莊僖簡公神道長松夾路殆五
六里由徑過單時中主簿墳菴訪白鶴洞水自中出今
從者側入以望云相去二三丈復有洞口濶數尺聞過
此則平廣道人輩採石脂於中云復出舊路行里餘乃

至僖簡追遠菴住持淨照來迎飯罷留題而出亭午至
橫澗折而東二里許抵川步訪所謂洞山者纔高二十
餘丈周圍三里篠形如張弓其上皆叢篠無他異洞口
流水清澈覓輕舸匍匐其中夾以炬火櫂而入崖石色
正白中爲裂罅謂之石脊石岸如削玉如砥平如剗刻
詭異不一鵝管鍾乳往往可取石燕遇火驚飛撲人行
數十丈頂稍高而洞寬俄值深潭邵生懼甚促歸或云
自此而進可陸行半里有石橋石磬之屬唐人刻姓名

在焉此洞惟冬涸可窮覽若積雨則水與洞平不可入
今日僅能入也曠時過長峴嶺入莊刑曹報慈菴賞木
犀遂歸是役也崖洞在邑南鄙者十得五六道輩且不

知所在况遊客乎尚有大城君陽洞期異日訪之丁酉

早謁果利廟

土人謂
之西廟

廟神乃後漢袁令玘今封嘉應字

人侯廟碑殊可觀正祠本在邑南銅棺山初曰荆南山

謂荆嶽
之南

相傳袁令將死天下銅棺如王喬玉棺然故曰

銅棺又名君山亦謂袁君也庚子早過香山以酒饌犒

匠人及役夫飯罷同仲謨自橫澗西行四五里訪靜樂寺荆溪尊者湛然此地人後傳天台教建中三年沒梁肅撰碑是日冒雨行小徑意寺可宿而破落不堪其憂留題而出常日在邑中望銅棺山甚遠今寺後一峯正倚山脚非好事不能至也里餘至莊子上知府菴欲循舊路復出橫澗會日向晚問土人得捷徑號使嶺既登峻甚仲謨窘於躋攀從者又畏班寅予不恤也一上約二三里乃得平頂俯視縣郭僅成聚落隔湖及衆澆一

一可指眼界廓然雨後下嶺尤險幾不能容足過西石
亭梅樹滿林邑人遊賞處也至山門始出大路暮夜抵
郭內甲辰晴未後約致遠過莊德政同度周橋訪後漢
許太尉夫人墓道中有石翁仲龜趺披榛莽至其下漸
爲邑人斲掘有碑側立字多磨滅惟其前數百字粗可
讀大畧云夫人會稽山陰人劉氏蓋太尉之婦也丙午
外舅之柩登舟未時至川步登陸雨驟作申後至塋所
戊申至香山送葬者畢集而地已不用矣庚戌觀側

洞即

聖觀百餘步一峯壁立狀若鐫刻紹聖四年有人遁形而

入故號會仙崖崖下流水可浮杯今有小亭午後同致

遠西南行里餘訪白馬洞將至澗水淙淙有聲其源出

洞中入洞頂如砥平鞠躬而進觀沈遼刻字歸辛亥早

同致遠肩輿西南行過黃家橋

此可登舟入邑

入湖狀度侍郎


橋再遊惠園其眷眷於此者以古澗碧流也又行十餘

里進遊大城洞單氏風土志謂洞門狹隘止容一人行

內頗寬曠有鹽米堆白石高峙如雪山狀洞中有四際

水流今殊不然入洞纔十步爲村民以土室之前日遣人開治僅高一二尺以草爲茵魚跳而進又行十餘步大石相倚中有深谷寸步滑磴且恐已而稍寬廣石乳如寶蓋垂於其上傍又有一谷然不若前谷之險稍前即大坑窅乃近歲崩陷者所謂塩米堆雪山不可至矣炬火欲盡遂出憩村民吳氏以茶果交相遺歸入饒州太守蔣天祐垂裕菴半里至君陽洞陸希聲云在君山之陽故以爲名洞去龍潭甚邇水自洞口出行兩崖間

清駛可愛天日下照不必秉燭視他洞爲勝惜乎天祐之兄營墳其上不復爲遊觀之地矣歸過金沙致遠獨遊停車以待同飯洞靈抵暮還邑凡宜興南鄙崖洞搜索殆遍惟圖志中載武陵洞在龍山去湖汭渚南十里中若張公洞石乳凝結有旌幢羽蓋之狀又有瀑布送流但榛蔓蒙密人迹罕至不能一往而南嶽山稠錫禪師道場古迹頗多且鄒志完所樂去縣二十里而近反未至焉既迫南歸須俟他年矣



說郭卷六十五上

欽定四庫全書

子部

說郛卷六十五下
六上

詳校官庶吉士臣陳若霖

員外郎臣牛稔文覆勘

總校官編修臣倉聖脉

校對官編修臣沈清藻

謄錄監生臣馮萬程

欽定四庫全書

說郛卷六十五下

元 陶宗儀 撰

乾道奏事錄

周必大

乾道庚寅南劍守闕到法當奏事以四月六日丁亥挈家泛舟入浙甲辰次隆興府己酉赴府會於東湖孺子亭按洪芻職方乘云湖在郡東南周廣五里酈道元云十里二百二十六步今士大夫多倡樓閣以環之城中奇觀也酒三行泛舟過總持院本唐僧子旼所造旼精太乙

術能祈雨乞晴今有井祈求不廢雷堂之後有澹臺滅
明墓芻云史記雖言滅明居楚又有渡江斬蛟之事然
豫章非真楚尚可疑也平江亦有澹臺墓院中老僧年
七十及從徐師川遊能寫字鼓琴自總持過講武亭復
登舟庚戌解維過樵舍鎮宿昌邑山五月辛亥朔抵吳
城山謁廟少休看經閣東坡所留石砮尚在近歲過客
又捨一矢形稍大而色青不若舊物之古也廟側有聖
池池中有小石浮水面壬子抵南康軍癸丑早肩輿過

簡寂觀觀門外斗壇石初爲沙石所堙前歲大水復出
與知觀歐陽齊年對泉石小酌食甜苦笋名不虛得飯
罷入棲真觀即梁昭明書堂前欲遊而不至者荒蕪殊
甚次至開先主僧虛席殊不成叢林而飛橋已爲大水
所衝少憩方丈首座川僧又逸粗可語同訪招隱泉有
亭覆之日斜歸甲寅赴軍會坐五老亭甚久而晴嵐暍
暖殊不滿人意乙卯凌晨冒大雨陸行四十里至延真
招德觀與江州樂順之教授相會飲菖蒲酒五行同登

閣而別由間道渡溪入淨慧院主僧淨一此兩處皆前
歲所未至者未後出山晚投宿尋真觀丙辰晴早過白
鶴樓賢寺寺愈蕭索獨登五老亭坐玉淵及三峽橋而
行約十里飯羅漢院院不經兵火而住持不得人日就
摧毀近長老方葺僧堂又引去今藏殿法堂童行堂之
屬氣象猶壯偉未時還軍別太守欲解纜南風太高遂
止丁巳拂旦離南康風順而高舟過大孤軒簸可畏泊
交石夾戊午過馬當泊波斯夾己未泊懷家渡庚申北

風大作移舟十餘里長風沙距舒州一百三十里辛酉
北風未止行四十里至蔣家汭夜月佳甚風稍定壬戌
至大通鎮癸亥早南風掛颿行近四十里片雲忽在頭
上轉爲北風兩舟相望篙師皆失色無措急令轉柁就
颿逆行十餘里入銅陵夾方定午至銅陵縣遊天王禪
寺今名護法殘僧敗屋不類叢林寺後山上有富覽亭
望江流帆三夾對岬即濡須也五里有寶雲寺李白祠
堂十里至銅坑邑在亂山中殊陋甲子北風復作夜來

月色如畫波伏不興今乃阻滯如此閻宰送別於石龍
磯磯下有洞雖爲三門而淺局無足觀稍前江邊有瑪
瑙石晚抵繁昌縣乙丑早風復作行夾中行四十里近
月子港而止過此復出大江故也丙寅風定雞再鳴乘
月解維過三山磯入青敦夾望魯江口遂入蕪湖泊吳
波亭下丁卯雨略至吉祥寺戊辰風雨稍止晨發蕪湖
過褐山磯未時次太平州己巳赴州會風雨不已天氣
如暮秋庚午再赴州飯初約會於凌歊不果飯罷獨往

比舊加葺塔後又創懷古堂恨烟雨不見歷陽畧至廣
福寺壬申早雨俄晴舟行小河甚駛至采石鎮以風氣
駁雜少留已而復行泊慈湖夾癸酉蚤入鵝港泊新河
口丙子早乘便風出新河午至長蘆寺江水漲溢去寺
才十餘步不暇遊也日欲晡次真州丁丑蚤欲行會大
雨不敢解維赴王守飯於山堂之澄澗閣同報恩長老
妙湍登塔兩級望金山及揚州大明寺塔遂同過漕司
東園即六一先生爲發運副使許元作記者所謂拂雲

之亭澄虛之閣畫舫之舟清讌之堂皆在焉戊寅至鎮
江府閏五月庚辰朔早至丹陽館携鄧子長及綸止甘
露寺不到已十八年鎮江因北固山以爲城而寺在上
東坡詩云古郡山爲城層梯轉朱闌盡之矣觀很石鐵
鑊李衛公像舍利塔所謂陸探微獅子惟有近歲畫本
餘皆亡矣舊多景樓乃行者堂去年太守陳天麟侍郎
別卜地起樓甚雄壯金焦二山在左右而面對瓜州似
勝舊基也辛巳冒大風雨登浮玉亭亭在江邊獨山上

或謂此即浮玉山故創亭焉後有小石山是爲蒜山又其後有土山號堅土山土紋皆堅固也登舟風益大衝浪至金山龍遊寺長老寶印川人有衆二百棟宇鼎新寺遶山臨水爲屋故諺云金山屋裏山焦山山裏屋蓋實錄也三門借石牌山爲案乃江中三石峯耳其外小山稍有樹木而烏雀不棲者世傳爲郭璞墓或謂石牌山正爲浮玉水漲不能沒唐人於此鑄鏡南岸創亭者非也別有鷗山以鷗棲得名寺有雄跨堂頗雄偉洪景

伯書額觀音殿下臨龍淵長老云頃年軍士習水戰嘗
墜石測之深三十二丈而揚子江心深七十餘丈云會
飯於方丈白絲糕黑鹹豉糖豆粥三者山中之精饌也
登妙高臺烹茶壁間有坡公畫像初公族成都在中和院
僧表祥畫公像求贊公題云目若新生之犢心如不繫
之舟要問平生功業黃州惠州崖州集不載蜀人傳之
茶罷上絕頂觀坡及晁無咎題字轉至頭陀崖頭陀姓
裴唐貞元中獲金於山而得名者聞此崖舊乃蛟窟也

中濡泉在水陸堂中陸羽品江心之水此與同味酌之
聞京口城中井水皆鹹濁甘泉僅一二云日午觀僧齋
畢過歙州門僧榻皆逼江夏滌方至憑欄眩駭大抵寺
之軒窓無不臨水而此尤可畏戲投餅餌鼃龜畢集初
欲自此下焦山而風雨殊未止復衝巨浪還西津亦危
道也謁下元水府廟而歸甲申早大雨舟行隔堤望練
湖記云方四十里自離鎮江皆沂流未後次丹陽縣古曲阿也
乙酉晴早過呂城閘至犇牛鎮晚次常州丁亥未後解

維抵暮僅行十三里宿小井戊子次無錫己丑午攜家

遊惠山住持法皞七十八矣同上南北閣酌陸子泉冰

泉龍淵泉憑水陸池檻觀龜戲而歸辛卯至平江丁酉

早出盤門如崑山以塘路橋低轉湖漈

土人謂之皇天蕩

正值

東南風打頭晡時方抵下苧瀆距府城纔十二里戊戌

抵崑山六月庚戌朔過山寺訪老僧法回步至塔院山

之絕頂也丙寅入婁門壬申出婁門晚次吳江縣甲戌

早次秀州丁丑至臨安開飯後入北關門權寓普惠院

河源志

潘昂霄

延祐丁卯春聖天子以四海萬國之繁軫念庶民艱虞
閭控告也分使諸外郡諸道宣布德音休戚興替之清
濁激揚之畿甸密邇獨不得均其澤越五月詔前翰林
學士承旨臣庫庫楚翰林院侍讀臣昂霄奉使宣撫京
畿西道臣昂霄奉命驚悖固措唯務罄竭忠赤盡求民
瘼而後已庫庫楚一日語昂霄曰余嘗從余兄榮祿公都
日抵西域窮河源昂霄聞之不覺矍然駭曰有是乎哉

請筆書其語公曰世祖高皇帝至元十七年歲在庚辰
余兄欽承聖諭曰黃河之入中國夏后導之知自積石
矣漢唐所不能悉其源今爲吾地朕欲極其源之所出
營一戍俾蕃賈互市規置航傳凡物貢水達京師古無
有也朕爲之以求後來無窮利益蓋難其人都實汝舊
人且習諸國語往圖汝諧受金虎符招討使以行是歲
四月至河洲東六十里有寧河驛驛西南五六十里山
曰殺馬關林麓穹隘譯言秦石達巴啓足浸高一日程

至巔西邁愈高四閱月約四五百里始抵河源冬還圖城傳
位置以聞上悅往營之授吐蕃等都元帥仍金虎符置寮橐
督工師悉資內地造航為艘六十城傳措工物完遣庫庫楚
驛聞適僧格征袞噶藏布不迴力阻遂止翌歲兄都實旋都河
源在吐蕃桑甘斯西鄙有泉百餘泓或泉或潦水沮洳散渙
方可七八十里且泥淖弱不勝跡逼觀弗克傍履高山下視
粲若列星以故名鄂端諾爾鄂端譯言星宿也羣流奔轆近
五七里滙一巨澤名鄂楞諾爾自西徂東連屬吞噬廣輪馬

行一日程迤邐東鶩成川號齊必勒河二三日程水西南來名
伊爾齊合齊必勒三四日程南來名呼蘭又水東南來名伊拉齊
合流入齊必勒其流浸大始名黃河然水清人可涉又一二日
岐裂八九股名伊遜鄂羅木譯言九度通六七里馬亦可
度又四五日程水渾濁土人抱革囊乘騎過之民聚落
糾木幹象舟傅毛革以濟僅容兩人繼是兩山峽東廣
可一二里或半里深巨測矣朶甘斯東北鄙有大雪山
名曰伊拉瑪博囉其山最高譯言騰格哩哈達即崑崙也

山腹至頂皆雪冬夏不消土人言遠年成冰時六月見之自八九股水至崑崙行二十日程河行崑崙南半日程地又四日程至地名庫濟克特是也相屬又三日程至地名哈喇伯勒齊爾四達之衝也多寇盜有官兵鎮防崑崙迤西人簡少多處山南皆不穹峻水亦散漫獸有鬣牛野馬狼狽羵羊之類其東山益高地亦漸下岸狹隘有狐可一躍越之者行五六日程有水西南來名納琳哈喇譯言細黃河也又兩日程地有水南來名

奇爾穆蘇合流二水入河河北行轉西至崑崙兩日程
地水過之北流少東又北流約行半月程至貴德州地
名必齊勃始有州事官府隸河州署司吐蕃等處宣慰
司所轄又四日程至積石州即禹貢積石五日程至
河州安鄉關一日程至打鑼坑東北行一日程洮河水
南來入河又一日程至蘭州下過北卜渡至鳴沙河過
應吉里州正東行至寧夏府南東行即東勝州界隸西
京大同路面自發源至漢地南北溪澗細流傍貫莫

可紀極山皆草石山至積石方林木暢茂世言河九折
彼地有二折蓋竒爾穆蘇及貴德州必齊勃也漢張
騫使絕域羈聯拘執難危百罹歷大宛月氏等數國其
傍大國五六皆傳稱之以爲窮河源烏能覩所謂河源
哉史稱河有兩源一出于閩一出葱嶺于閩水行合葱
嶺河注蒲類海流狀至臨洮出焉今洮水自南來非蒲
類明矣詢之土人言于閩葱嶺水其下流散之沙磧又
有言與天河通尋源得織女支機石而歸亦妄也崑崙

出嵩高五萬里閻風玄圃瑤草華蓋仙人所居又何邪
唐史吐蕃傳河上流由洪濟梁上南二十里水益狹春
可涉秋天可勝舟其南三百里三山中高而四下曰紫
山右所謂崑崙其言頗類然止稱河源其間云國家蔽
天威亘天地所覆幬無間海內外冠帶萬國罔非臣妾
視漢唐爲之不足訝故窮河源去萬里若涉閨闈嘻盛
典也不可不志因志之都實族女真 蔡氏統烏
藏路暨招討都元帥凡三百里至吐蕃 任甘肅

行省參知政事是歲八月初吉謹述

--	--	--	--	--	--	--	--	--

于役志

歐陽修

景祐三年丙子歲五月九日丙戌希文出知饒州

戊子送希文飲于祥源之東園

壬辰安道貶筠州

甲午師魯貶郢州

乙未安道東行不及送余與君貺追之不克還過君謨
家遂召穆之公期道滋景純夜飲

丁酉與損之送師魯于固子橋西興教寺余留宿明日

道卿損之公期君貺君謨武平源叔仲輝皆來會飲
晚乃歸余貶夷陵

己亥夜過蘧卿家話別蘧卿病也

庚子夜飲君貺家會者公期君謨武平秀才范鎮道滋
飲婦家不來

辛丑舟次宋門夜至公期家飲會者君謨君貺景純穆
之道滋飲婦家不來

壬寅出東水門泊舟不得岸水激舟橫于河幾敗家人

驚走登岸而避遂泊亭子下損之來弈棋飲酒暮乃歸

癸卯君貺公期道滋先來登祥源東園之亭公期烹茶道滋鼓琴余與君貺弈已而君謨來景純穆之武平原叔仲輝損之壽昌天休道卿皆來會飲君謨景純穆之壽昌遂留宿明日子野始來君貺公期道滋復來子野還家餘皆留宿君謨作詩道滋擊方響穆之彈琴秀才韓傑居河上亦來會宿

己巳晨興與宿者別舟既行武平來追及至下鑠見之
少頃乃去午次陳留登庾廟

丙午在陳留

丁未次南京明日留守推官石介應天推官謝郭石軍
巡判官趙袞曹州觀察推官蔣安石來小飲于河亭
余疾不飲客皆醉以歸

六月己酉次柳子

庚戌過宿州與張參約泊靈壁鎮游損之園會余有客

住宿州參先發棧靈壁待余不至乃行晚次靈壁獨
遊損之園會舟次失水道敗拖

辛亥次青陽

壬子至于泗州晚與國器小飲

癸丑始見春卿

甲寅乙卯丙辰獨在泗州始食淮魚

丁巳次洪澤與劉春卿同年黃孝恭相遇始識大理寺
丞李惇裕洪澤巡檢顏懷玉者錢思公在洛時故吏

遂與四人者夜飲五鼓罷明日食畢解舟與飲者別
春卿復相送以前晚入沙河乘月夜行嚮山陽與春
卿聯句二鼓宿閭下黎明元均來遂至楚州泊舟西
倉始見安道于舟中安道會飲于倉亭始食瓜出倉
北門看雨與安道弈

庚申小飲舟中會者元均春卿安道余始飲酒移舟棧
城西門門閉泛月以歸

辛酉安道解舟不果別與春卿奕于倉亭晚別春卿

壬戌與元均小飲倉北門舟中夜宿倉亭

癸亥夕與元均坐水次納涼已而大風雨震電暴至

乙丑與隱甫及高繼隆焦宗慶小飲水陸院東亭看雨
始見荷花

丙寅與元均隱甫飲于西倉

丁卯隱甫來會登倉北偃上亭納涼遲客至遂及元均
小飲舟中已而大風震電遂宿舟中

戊辰余生日具酒爲壽于舟中

己巳與元均泛舟北辰會隱甫小飲宿倉亭

庚午同年朱公綽來自京師

辛未子聰來自壽州夜飲倉亭留宿

壬申泛舟飲于北辰

癸酉隱甫來飲別與元均小飲宿倉亭

甲戌知州陳亞小飲魏公亭看荷花與者隱甫朱公綽
晚移舟楚望亭陳從益來自京師見余于舟中始聞
君謨動靜秀才陳策來自京師夜見余于楚望亭作

常州書自泊西倉至于楚望凡十有七日

乙亥次寶應

丙子至于高郵

七月丁丑復見子聰會飲弭節亭

戊寅遂與子聰同舟以前次邵伯

己卯至于揚州遇秀才廖倚夜與倚及子聰飲觀風亭

明日子聰之潤州廖倚之楚州伯起來宿觀風亭

辛巳與伯起飲漕渚亭會者集賢校理王君玉大理寺

丞許元太常寺太祝唐詔祠部員外郎蘇儀甫

壬午儀甫來小飲觀風亭會者許元唐詔君玉伯起先

歸

癸未與許元小飲溯渚亭會者如壬午伯起不來

甲申與君玉飲壽寧寺寺本徐知誥故第李氏建國以
爲孝先寺太平興國改今名寺甚宏壯畫壁尤妙問
老僧云周世宗入揚州時以爲行宮盡朽壤之惟經
藏院畫玄裝取經一壁獨在尤爲絕筆太息久之

乙酉小飲秀才呂有家會者如壬午伯起不來余遂留宿

丙戌至于真州大熱無水

辛卯飲僧于資福寺移舟溶溶亭處士謝去華援琴待涼以入客舟

戊戌入客舟泊涵虛亭

庚子次江口

辛丑次長蘆

壬寅夜乘風次清涼寺

癸卯晨至江寧府

八月丙午猶在江寧

丁未小飲君績家

己酉小飲于水閣

庚戌次采石

辛亥阻風與侍禁陳宗顏飲

壬子過太平州夜乘風宿帶星口

癸丑過蕪湖繁昌宿慈母磯

甲辰乘風晝夜行

丙辰禱小姑山神至江州

丁巳在江州約陳侍禁游廬山余病呼醫者不果復遂
行次郭家洲

己未阻風郭家洲與澧陽縣令趙師道飲村市就村人
市羊供膳不得余疾謀還江州召廬山僧以醫不果
庚申次盤唐港

辛酉至于蕪陽

壬戌小飲瞿珣家會丹稜知縣

闕

郎范祐蕪春主

簿郭公美

癸亥次新治禱江神得大魚

甲子至于磁湖

乙丑猶在磁湖自丁巳余體不佳至是小間

丙寅至于黃州

丁卯與知州夏屯田飲于竹樓興國寺又約余明年爲

社飲不果夜登江澳次漆磁

戊辰次雙柳夾

己巳次白楊夾

庚午至于鄂州始與令狐修己相識

辛未遣人之黃陂召家兄大風不克渡江而還

壬申小飲修己家遂留宿明日家兄來見余于修己家

始中酒睡兄家

甲戌飲于兄家

乙亥飲令狐家夜過兄家會宿

九月丙子次沌口

丁丑次昭化港夜大風舟不得泊禱江神

戊寅次穿石磯夜大風擊舟不得寢

己卯至岳州夷陵縣夜來接泊城外

庚辰假舟于邵暖

辛巳壬午入官舟

癸未入荆江次李家洲

甲申次鳥沙

乙酉次魯湫

丙戌次塔子口觀魚望五鵝鹿角望夫諸山

丁亥次石首夜大風

戊子阻風

壬辰次公安渡

右于役志一卷雖非著述傳流至今則不可略按夷陵抵京師一千六百里公與尹師魯書云臨行臺吏

催苛百端始謀陸行以大暑又無馬乃沿汴絕淮泛
大江凡五千里用一百一十程纔至荆南與此志合
自公安後關而不錄既以十月二十六日到官則留
荆約旬餘正庭參轉運時也

王慎中曰此公酒肉帳簿也亦見史筆

峽程記

韋莊

三峽連山七百里畧無斷處自非亭午不見日月水經云杜宇所鑿以通江水

峽乃三峽之門兩崖並峙中貫一江灩澦當其口真天險也

灩澦堆乃積石所成江心突兀而出水經所載白帝城西有孤石冬月石出二十餘丈夏即没世俗相傳灩澦大如象瞿唐不敢上灩澦大如馬瞿唐不可下是也

六月下瞿唐水高于堆不知其幾至峽口則水洶湧逆
流舟人相顧失色

急水過堆余曾冒險下峽然舟人雖利之責之不敢下
也

瞿唐水漲一瀉千里故太白詩云朝辭白帝彩雲間千
里江陵一日還

急流處有瀆有漩緩棹隨漩乃得出不與水爭爭即舟
埋水矣

三峽多猿故鄴道元曰猿鳴三聲斷客腸

--	--	--	--	--	--	--	--	--

述異記

任昉

盤古氏

昔盤古氏之死也頭爲四岳目爲日月脂膏爲江海毛髮爲草木秦漢間俗說盤古氏頭爲東岳腹爲中岳左臂爲南岳右臂爲北岳足爲西岳先儒說盤古氏泣爲江河氣爲風聲爲雷目瞳爲電古說盤古氏喜爲晴怒爲陰吳楚間說盤古氏夫妻陰陽之始也今南海有盤古氏墓亘三百餘里俗云後人追葬盤古之魂也桂林

有盤古氏廟今人祝祀

鬼母

南海小虞山中有鬼母能產天地鬼一產十鬼朝產之

暮食之今蒼梧有鬼姑神是也虎頭龍足蟒目蛟眉

蛟

日圓蛟
屬連生

今吳越間防風廟土木作其形龍首牛耳連眉

一目

防風氏

昔禹會塗山執玉帛者萬國防風氏後至禹誅之其長

三丈其骨頭專車今南中民有姓防風氏即其後

響玉

侯家肅客則鳴響玉

蛇市

揚州有蛇市市人鬻珠玉而雜貨鮫布鮫人即泉先也
又名泉客

龍紗

南海出鮫綃紗泉先潛織一名龍紗其價百餘金以爲

服入水不濡

龍綃宮

南海有龍綃宮泉先織綃之處綃有白之如霜者

珊瑚市

鬱林郡有珊瑚市海先市珊瑚樹碧色生海底一株十
枝枝間無葉大者高五六尺至小者尺餘鮫人云海
上有珊瑚宮漢元封二年鬱林郡獻瑞珊瑚

女珊瑚

光武時南海獻珊瑚婦人帝命植于殿前謂之女珊瑚
一旦柯葉甚茂至靈帝時樹死咸以謂漢室將亡之徵
也

龍珠

凡珠有龍珠龍所吐者虵珠虵所吐者南海俗諺云虵
珠千枚不及玫瑰言虵珠賤也玫瑰亦是美珠也越人諺云種
千畝木奴不如一龍珠

珠市

越俗以珠爲上寶生女謂之珠娘生男謂之珠兒吳越間俗說明珠一斛貴如王者合浦有珠市

瑞筍

東海畔有孤竹焉斬而復生中有管周武王時孤竹之國獻瑞筍一株

空桑

空桑生大野山中爲琴瑟之最者空桑也

古宮

帝舜都邠門古宮存焉宮前有堯臺舜館銘記古文莫有識者

湘竹

湘水去岸三十里許有相思室望帝臺昔舜南巡而葬於蒼梧之野堯之二女娥皇女英追之不及相與慟哭淚下沾竹竹文上爲之班班然

懶婦魚

江南有懶婦魚俗云昔楊氏家婦爲姑所溺而死化爲

魚焉其脂膏可燃燈燭以之照鳴琴博奕則爛然有光
及照紡績則不復明焉

琵琶魚

海魚千歲爲劔魚一名琵琶形如琵琶而善鳴因以名
焉

角虎

漢中山有虎生角道家云虎千年則牙蛻而角生

閩閭墓

闔閭夫人墓中周迴八里別館洞房迤邐相屬漆燈照
爛如日月焉尤異者金蠶玉燕各千餘雙

姑蘇臺

吳王夫差築姑蘇之臺三年乃成周旋詰屈橫亘五里
崇飾土木殫耗人力宮妓數千人上別立春宵宮爲長
夜之飲造千石酒鍾夫差作天池池中造青龍舟舟中
盛陳妓樂日與西施爲水嬉吳王於宮中作海靈館館
娃閣銅溝玉檻宮之楹檻珠玉飾之

文種墓

廣州東界有大夫文種之墓墓下有石爲華表柱石鶴一隻種即越王句踐之謀臣也

趙王園

邯鄲有故宮基存焉中有趙王之果園梅李至冬而花春得而食

銅駝石犬

鄴中銅駝鄉魏武帝陵下銅駝石犬各二古詩云石犬

不可吠銅駝徒爾爲

香水

一說香水在并州其水香潔浴之去病吳故宮亦有香水溪俗云西施浴處人呼爲脂粉塘吳王宮人濯粧於此溪上源至今馨香古詩云安得香水泉濯郎衣上塵俗說魏武帝陵中亦有泉謂之香水

磨鏡石

饒州俗傳軒轅氏鑄鏡於湖邊今有軒轅磨鏡石石上

常潔不生蔓草

裸人鄉

桂林東南邊海有裸川桓譚新論云呈衣冠於裸川海

上有裸人鄉

石麒麟

丹陽大姑陵陵下有石麟二枚不知年代傳曰秦漢間公卿墓則以石麒麟鎮之盧氏縣有盧君古塚塚旁柏二株枝條蔭茂二百餘步樹文隱起皆如龜甲根勁如

銅石

彈箏谷

安定西隴道其谷中有彈箏之聲行人過聞之謂之彈箏谷

粉水

粉水出房陵永清谷取其水以漬粉即鮮潔有異於常謂之粉水

九井

漢水西山有九井井中常出五色煙高數丈傳云昔人有繩入得數斛空青

却塵犀

却塵犀海獸也然其角辟塵致之於座塵埃不入

燃石

羊山上有燃石其色黃而文理疎以水沃之便如煎沸其上可炊烹稍冷即復以水沃之

辟寒香

辟寒香丹丹國所出漢武時入貢每至大寒於室焚之
暖氣翕然自外而入人皆減衣

迷穀

迷穀出招搖山亦名鵲山其樹如穀又如楮其花四照
名曰迷穀如佩之令人不迷

夢口穴

南康雩都縣西淞江有石室名夢口穴嘗有船人遇一
人通身黃衣擔兩籠黃瓜求寄載過至岸下此人唾盤

上徑下崕直入石穴中船主初甚忿之見其人入石始知異視盤上唾悉是金矣

明月珠

噲叅養母至孝曾有玄鶴爲戎人所射窮而歸叅叅收養療治瘡愈放之後鶴夜到門外叅秉燭視鶴雌雄雙至各銜明月珠以置叅家

風生獸

炎洲在南海中上有風生獸似豹青色大如狸網取之

積薪數車燒之不然鐵鎚鍛頭數十下乃死以口向風
須臾便活以石上菖蒲塞鼻即真死取其腦和菊花服
之可壽五百歲

異鳥

蘭陵山有井異鳥巢其中金翅而身黑此鳥見即大水
井不可窺窺者盈歲輒死

玉女岡

萍鄉西津有玉女岡天當雨輒先涌五色氣於石間俗

謂玉女披衣

石鼓

八方之荒有石鼓其徑十里撞之其音即成雷也天之
申威於此

黑蠶

員嶠山名還丘東有雲石廣五百里有蠶長七寸黑色
有鱗角以霜雪覆之然後作繭長一尺其色五采織爲
文錦入水不濡

妬女泉

并州妬女泉婦人不得靚粧綵服至其地必興雲雨一名是介推妹

俞兒

齊桓公北征孤竹見人長尺具衣冠左袪而走於馬前管仲曰此山之神也名曰俞兒霸王之君興則見也

石室山

信安郡石室山晉時王質伐木至見童子數人碁而歌

質因聽之童子以一物與質如棗核質含之不覺饑俄頃童子謂曰何不去質起視斧柯爛盡既歸無復時人

螺亭

螺亭在南康郡昔有一女採螺爲業曾宿此亭夜聞空中風雨聲乃見衆螺張口而至便亂噉其肉明日惟有骨存焉故號此亭爲螺亭

棗梨

北方有七尺之棗南方有三尺之梨凡人不得見或見

而食之即爲地仙

積憂蟲

漢武帝幸甘泉長平阪道中有蟲赤如肝頭目口齒悉具人莫知也時東方朔曰此古秦獄地也積憂所致上使按圖果秦獄地朔曰夫積憂者得酒而解乃取蟲置酒中立消

止雨笛

周穆王時天下連雨三月穆王乃吹笛其雨遂止

報春鳥

顧渚山有報春鳥春至則鳴秋分亦鳴似鶻鳩之類也

返魂樹

聚窟州有返魂樹伐其根心於玉釜中煮取汁又熬之
令可丸名曰驚精香或名震靈丸或名反生香又名卻
死香死尸在地聞氣即活

獬豸

獬豸者一角之羊也性知人有罪臬陶治獄其罪疑者

令羊觸之

黃頭郎

鄧通以權船爲黃頭郎曰土勝水其色黃故刺船郎皆著黃帽

化蛾

楚莊王宮人一旦而化爲野蛾飛去

古諺

漢世古諺曰雖有神藥不如少年雖有珠玉不如金錢

香市

日南有香市商人交易諸香處

香尉

漢雍仲子進南海香物拜爲涪陽尉時謂之香尉日南有千畝林名香出其中

宮人草

楚中有宮人草狀如金盞而甚氤氳花色紅翠俗說楚靈王時宮人數千皆多愁曠有囚死於宮中者葬之後

墓上悉生此花

靈楓

南中有楓子鬼楓木之老者爲人形亦呼爲靈楓

甜溪

甜溪水其味如蜜東方朔得以獻武帝帝乃投於陰井
中井水遂甜而寒洗浴則肌理柔滑

離合風

列禦寇鄭人御風而行常以立春日歸乎八荒立秋日

遊于風穴是風至即草木皆生去則草木皆落謂之離
合風

玉燕釵

漢武帝元鼎元年起招靈閣有一神女留一玉釵與帝
帝以賜趙婕妤至昭帝元鳳中宮人見此釵光瑩甚異
共謀欲碎之明視釵匣唯見白燕直升天去後宮人常
作玉釵因名玉燕釵

辟寒金

三國時昆明國貢魏噉金鳥鳥形如雀色常翱翔海上吐金屑如粟至冬此鳥即畏霜雪魏帝乃起溫室以處之名曰辟寒臺故謂吐此金爲辟寒金也

石櫛石履

興安縣水邊有平石其上有石櫛石履各一具俗云越王渡溪脫履墮櫛於此

乳窟

荊州清溪秀壁諸山山洞往往有乳窟窟中多玉泉交

流中有白蝙蝠大如鴉

水虺

水虺五百年化爲蛟蛟千年化爲龍龍五百年爲角龍
千年爲應龍

封使君

漢宣城郡守封邵亘化爲虎食郡民呼之曰封使君因
去不復來故時語曰無作封使君生來治民死食民夫
人無德而壽則爲虎虎不食人人化虎則食人蓋恥其

類而惡之

獍

獍之爲獸狀如虎豹而雄小始生還食其母故曰梟獍

鵠國人

西海外有鵠國人長七寸日行千里百獸不犯惟畏海
鵠鵠見必吞之在鵠腹中不死鵠一舉亦千里

狻猊

狻猊獸中最大者龍頭馬尾虎爪長四百尺善走以人

爲食遇有道君即隱藏無道君即出食人

鼠國

西域有鼠國大者如犬中者如兔小者如常鼠頭悉白
商賈有經過其國者若不祈之則嚙人衣裳

六角牛

周成王時東夷送六角牛

磅礮山

磅礮山去扶桑五萬里日所不及其地甚寒有桃樹千

圍萬年一實一說曰本國有金桃其實重一斤

活人草

漢武帝時西方日支國有獻活人草二莖有人死者將草覆面即活

玉桃

崑崙山有玉桃光明洞澈而堅瑩須以玉井泉洗之便軟可食

虹飲

晉時晉陵薛願家有虹飲其釜中水須臾而竭願因以酒祝而益之虹復飲盡吐金滿釜而去願家遂至大富
真香茗

巴東有真香茗其花白色如薔薇煎服令人不眠能誦無忘

伺潮鷄

伺潮鷄潮水上則鳴孫綽望海賦曰石鷄清響而應潮是也

龍羹

漢元和元年大雨有一青龍墮於宮中帝命烹之賜羣臣龍羹各一杯故李尤七命曰味兼龍羹七命即文章名也

青牛

千年木精爲青牛

猿

猿五百歲化爲獾獾千歲化爲老人

鵠

鵠壽三千歲

鷲

鷲之千年生胡髯

虎魚

虎魚老者爲蛟

穆王犬

周穆王之犬日走千里食虎豹

水精宮

闔閭構水精宮尤極珍怪皆出自水府

雨魚

古說雍州雨魚長八尺寸許

雨金

漢惠帝二年宮中雨黃金黑錫

雨錢

周時成陽雨錢終日而絕

雨鹿

漢成帝末年宮中雨一蒼鹿殺而食之其味甚美

雨石

魏武帝末年鄴中雨五色石

雨粟

魏世河內冬雨粟

禹餘糧

今藥中有禹餘糧者世傳昔禹治水棄其所餘糧於江

中生爲藥也

懶婦箴

桂林有睡草見之則令人睡一名醉草亦呼爲懶婦箴
又出海南地記

鳴琴川

梧桐園在吳宮本吳王夫差舊園也一名鳴琴川

枕椰麵

西蜀石門山有樹名曰枕椰皮裏出屑如麵用作餅食

之與麵相似因謂之枕榔麵焉

蟹奴

瓊瑤似小蚌有一小蟹在腹中爲瑤出求食故淮海之人呼爲蟹奴

說郛卷六十五下